

الحكمة والحجاية

حلم

شعر

عمر السوهاجي



بطاقة الكتاب

المحطة الجاية .. حلم
عمر السوهاجي
شعر

رقم الإيداع : ٢٠١٩ / ١٣١١٠
الطبعة الأولى
عدد الصفحات : ١٠٠
تاريخ الإصدار: يونيو ٢٠١٩

الإخراج الفني والمراجعة اللغوية
دار وادي عبقر للطباعة والنشر

رئيس مجلس الإدارة
جابر الزهيري
المدير التنفيذي
لمياء حمدي

جميع حقوق الطبع والنشر
محفوظة للمؤلف ، ولا يحق
لأي دار نشر طبع ونشر و
توزيع الكتاب إلا بموافقة
كتابية من الكاتب و الناشر



دار وادي عبقر
للطباعة و النشر و التوزيع

بيت الإبداع .. و موطن العباقرة

 wadiabkr.wixsite.com/wadiabkr

 wadiabkar@gmail.com

Watch us on
YouTube www.youtube.com/wadiabkr/

f www.facebook.com/wadiabkar

 ٠١١٤١٧٢٨٦٢٥

ت : ٠١١٠٠٤٧٤٥٧٥

ت : ٠١٢٢٤٩٦٩٠٤٨

ت : ٠١٢٢١٤٨١٨٥٦



عمر السوهاجي



الإهداء

إلى

روح كل شهداء الوطن في كل العصور

إلى

كل أصحاب الكلمة الخالية من النفاق

إلى

زهرات عمري و نبت حياتي

بناتي

أهديكم محبتي و أشعاري

عمر أبو عمرة (السوقا جدي)



غاب القمر

من يوم ما غاب

ضى القمر ...

وانا طير ملوش

ف الشرع دين !

عايش حزين !

مكتوب عليه

هم السنين !

مكتوب له يفرش

حسرتة

و ينام و حاضن

دمعته



حتى الغطا غازله بأنين !

مستنى أحلامه

تلاقيه !

وهيلقى إيه ؟

وهيلقى إيه غير لحن

مكتوف الإيدين !

معزوف على نايه

الحزين

ترانيم ربيعه

المبهمه !

و انا كلما !

حاولت اشوف

ضي القمر

لاجل إنى أشرب



م الهنا
ما المحش غير أنهار
جحيم
و فروع حنين
نافضة ورقها ع الطريق
مكسيّة من توب
الخريف
و ربيع غريق
و انا شبه طيف
طاير مرفرف في
السما
سائلة دموعه
مرتمّة
" إني أنا

في العشق بتُّ
ملازماً
ضوء القمر
استنشق السر الغزير
المنهمر
قد غار جنْدٌ من فراق
مستتر
سلب الفؤادَ بريقه ثم
ارتحل
أين القمر؟ "

...

ما تقولي فين ياللي
انت مخلوق
من حجر

كأف قلب ذاق منك
ألم
لأء ما ف يوم أنتحر !

" أما أنا

سأظل للعهد القديم

مرابطا

كي أحيي نبض

المنتظر "

مهأا حصل

و هايجي يوم

و القى القمر



لحن الوفا

وهقولك إيه ؟
بالرغم من طول
السنين
اللي انطوت ف كهوف
حنين
و بتنتظر لحظة
أمل .. !
رغم العذاب رغم
الأمم .. !
إلا اني ... لسه
بعشقك !



....

رغم الفراق اللي
خيوطه اتمكت

كل البيان .. !

ورسم شباكه ع الحيطان

اللي بتحوي ذكريات

حبي اللي دام

عشرين سنة ... !

و أربع شهور و يومين

كمان ... !

هافضل أصون عهد

الوفا !

و اخلق أمل ... !

معجون بمصل من

الجفا !

و انفخ ف روحه
من ربيع عهدي اللي

كان !

و انعش ف نبضه

الذكريات !

كل اللي ... فات !

حتى الوريد

هاملاه حنان !

....

و انشد طقوس محيي

الممات ...

واعزف و اقول ... !

يا لحن بات

" يا لحن بات ... و لم يزل

بين الحشا

انهض بسيفك مسرعا

صوب الجفا

و ابتر فؤاد البين ردد منشدا

لحن الوفا

حتى الممات

و افتح طريق

المعجزات

و ارفع جناحك

للسماء ! "

....

انهض و قوم

رفرف و حوش كل

الغيوم ...

اللى زرعتها ف يوم

ضنا !

و أفرش مكانها بحور

ورود ...

تمطر هنا .. !

" يا ساكنا بين الحشا

أقبل ولا تخش العدا

إني أعاني فرقة

قد أسكنت قلبي

الردى

بالرغم من طول

المدى

أيقظ ربيعك

بالندى "

و اعزف بعود

شمس الخلود ... !

و اطلق شعاع ...

لحن الوفا !

يا ساكنا بين الحشا

الفاتنة و القطار

عدى قطر الذكريات
فوق رصيف الأمنيات
و التقاني
ليل بينهش ف
الضلوع
ليل و رافض إن فجره
يحن لحظة
للرجوع
لما عدى
كان ظانني
إني راح أفرح

واغني ...
بحلم قابل
للخضوع
حلم شمسه
نار بتكوي ضهر
شوقي
تحني عودي
ولحني ينزف بالدموع

....

كان ظانني
كان ظانني .. وخاب
ف ظنه
لما فكر لحظة إنه
يحيي ميت .. بالوعود

و ان عرشه فوق

ضلوعي

هايبقى تمثال

للخلود

حتى وردي اللي

افترش له ف يوم

طريقه

آن أوانه يكون له

شوك

....

آه يا قطر ملووش

أمان

شكله آن ليك

الأوان

بايدي هاختم خط
سيرك
و أرمى جوه احضاني
غيرك
واعدل الهرم اللي
بايديك
مال بهمة لقطر
خااااان
آه يا قطر ملوش أماااااان

ما بين دارين

ما بين دارين

و انا التايه

و مش عارف طريقي

لفين ؟

ما بين دارين

و معروض لي حصاد عمري

على الكفين

جبال مكسيّة فوق

كفي الشمال

بذنوب

و حسنة يا دوب

و كام دمة على الخدين

دموع الحسة سجناني

ما بين شبرين

بتسرد لحن آمالي

بآه و أنين

و انا الجاني

على نفسي و كلي

يقين

و انا المحتار

ما بين نارين

هاقوله إيه ؟

....

أقوله إيه ؟

أقوله اني خلاص

ندمان !
وعن فرضك ما عدتس
احيد !
خلاص خلصت
بايه هايفيد ؟
ما انا الغطان
ما ياما الأهل نصحوني
و كنت عنيد !
و كنت أما اسمع
اللي ينادي لرحابه
أقول تعبان !
وإنه أكيد
ما يقصدنيش !
و لو صادف و يوم

لبيت

باكون كسلان

ما انا انسان

فى طبعه خسيس

قابلت النعمة

باللغة

و انا عثمان

يزيد عمري

على عمري

كمان عمريين

و اقولك ايه ؟

أمانى شيطان

....

واقوله ايه ؟

و اقلوه إيه على نونبي

وعن توبي

اللي صار دبلان

وعن زرعي لسنين

عمري

بحصاد فلسان

وعن هجري اللقا

و اناحي

وعن تركي الكتاب و الضي

وعن إنسان !

عشق ننبه وعاش غفلان !

واقوله إيه ؟؟

ما لاقى كلام !

حدوتة بعد النوم

كان يا مكان ...

كان فيه غراب

ملعون لنيم!

كان حلم عمره

يكون أمير سرب الطيور

طار الغراب

رفرف و حام فوق السحاب

لف البلاد

لاجل انه يعرف

كل طير

من فين يكون؟

أما الأمير
كان الأمير زينة
النسور
و كات له هبية
و كان جسور
حتى الجبال
شاهده بتاريخه
في اللي فات
من ذكريات
منقوشة على مر العصور
ألفين سنة
و خمستلاف
ولا عمره حتى

ف يوم ما خاف
أو طاطى راسه أو
انحنى
رغم الضغوط كان
الصبور

....

راح الغراب عند
الأمير
و لبس له توب
المخلصين
قال يا أمير
: أنا طير أمين
لفيت بلاد المحرومين
و اعرف خبايا كل

طير

وان يوم أمرت

هاقول : أمين

قام الأمير

قاله انت مين ؟

رد الغراب

عبد الغلابه الشقيانين

عجب الأمير رد اللئيم

أصدر قرار

إن الغراب يصبح كبير

البصاصين

فرح الغراب

و سجد و باس ريشه

الحرير

و طلع قوام
و طلع قوام و جمع
غفر سرب الأمير
بدل و شال منهم
كتير
جاب الطاوس !
لاجل انه يسحر به العيون
خلاه وزير
عين طيور ملهاش أصول
وحكم زمام كل الأمور
حتى الجنائين و القصور
حكما بوم
جاب بغبان
حلو اللسان ...

حافظ تمام

خلاه دليل سرب الطيور

قام الغراب نشر الخراب

واستنى لحظات السكون

و قعد يدور

لاجل انه يسرق م الأمير

عرشه المصون

غفل الأمير لحظة منام

راح قام غراب البين قوام

سلسل أميره بميت لجام

و صبح خلاص هو الأمير!

وتوتة توتة....

لسالها باقية الحدوتة

جابت ضرفها

جابت ضرفها

و ققلت كل البيبان !!

وصراخنا فيها من

الأم ...

أصبح حراللام !

يا دنيا ليه سايقة

العوج ؟

ومسئمة الحيل للشيطان !

و مخليانا يا دوب

غنم

ومطوقانا بميت لجام !

مين اللي قال ... ؟
مين اللي قال حضنك
وطن ... ؟
ده القبر فيكي أصبح
سكن ...
والأصل فيكي انك
كفن ...
مفروش غيطان ... !
حتى اللي قال ... !
حتى اللي قال إما
اتوهم ... !
أو ضهره داق طعم
اللجام ... !
....

مين اللي داق فيكي الفرحة ... ؟

غير الخسيس و ابن

الحرام ... !

ما تردّي يا دنيا

العجب ... !

والا السؤال

ف الأصل متحرّم

كمان ... !

توب الشريف لبسه

العفن ... !

والحر أصبح متهم !

حتى الخسيس صار

مؤتمن ... !

و صبح كمان هو

الهمام ... !
وارجع واقول ...
مين
اللي
قأااال ؟

الابن الحنون

لوع الوجع !

فأنا م الوجع

ياما اشتكت مني

الدموع !

لوع الأهات اللي

بعدها سبّحت بيها

الضلوع !

تكفيني سجادة أنين ...

أفرشها قبلة

للخشوع !

واعطش واجوع

ما يهمنيش !
مهما انكويت منك
بنار ...
هاقدر بحبك إني
اعيش ..
بس انتي ليه ما
بترحميش ؟
جاوبيني يا أم
المحرومين !
يا أم الغلابة
الشقيانين !
كل اما اقولك
محتاجين ...
ردك عليا يكون

ما فيش !
طب اقول
لمين ؟
اقول لمين وانتي
اللي واخدة كل
خيري !
أهديكي شهدي
تزيدي فيه و تديه
لغيري !
لما انتي غويالي
الوجع !
ليه بين غيطانك
تغرسيني ؟
كان نفسي مرّة

تحسي بيا
او حتى إنك يوم
تغيري !
حتى اللي مالكة
ما بين ايديا و نهر
نيلي !
سبتيه كمان للي
معادينني !
و فاضلي إيه ؟
و فاضلي إيه غير
مر طافح من جيبيني !
بارسم بحبره المختزل
فرحة أمل !
يمكن ف يوم تصدف

سنيني !
وان جيت وغيرت
ف يوم عليكي !
ما بين حيطانك
تحبسيني !
هو انتي ايه ؟
ما بتفهميش ؟
يا بايعة لحمك
للغريب
وملبساه توب
الحبيب
عيزاني اطلبل لجل
عيش ؟
يحرم عليا ف يوم

أكون ديوث و اعيش !

....

من عهد موسى و مال قارون

وانتي ابتليتي

بالطاعون !

و انا لجلك انتي

برضه راضي

وان زدتي قسوة بيري

عاطي

و لا عمري افكر لحظة اخون !

مهما تزيد بيا الهموم !

هافضل أنا

الابن ال ح ن و ن

ملحمة الأسود

لجل اللي مات ...
من عهد فات
تحت المدارس و القصور!
طلعت نسور
ظن اليهودي ابن
الجبان
إن الأسد يقدر ينام
من غير ما يفرش حلمه
نور
و ازاي ينام ؟
هو اللي داس يوم

ع التتار

ينفع يبات .. ويكون له

تار .. ؟

ولا اللي يوم حفر

القتال

هيسيب حقوقه ف يد

فاااار .. ؟

دي أمور هزااااار

قام السادات

قام السادات لجل اللي

مات

جمع الأسود

في طابور ثبات

وإدى الإشارة

بالعبور
طارت نسور
طارت نسور فوق
السحاب
دكت حصون كل
الكلاب
و أسودنا قامت
بالعبور
الله اكبر ... الله اكبر
كان الهتاف
ذكر الإله
و صيامنا كان سابقه
الصلاة
بعزيمة كامنة في

الصدور
فوق القتال
فوق السحاب مدوا
الجبور!
ما أسودنا حالفين
ع الكتاب
إما الشهادة و جنة لنا بدون
حساب
أو نصر منقوش ع
الصخور
صبوا السيول
نزلت بحور كل الغضب
فوق الرمال
من جيش محال

يصمد قصاده اعنى الرجال

شق الجبال

و ف لحظة بارليف خطه

داااب

و صبح سرااااب

و أسودنا دكوه بالنعال

رغم العذاب

حلفت جيوشنا تكون

عقاب

على كل من هتك الشرف

و برجله كان داس ع التراب

...

و أدي جولدا شايقة بعينها نار

كرهت ساعات الانتظار

أخذت قرار
و اتحرّكت قاصدة
الحليف
و ساعات يا دوب
فردوا قلوبهم عل
الحدود
والمصرى غني بأعلى
صوت
" رسمنا علي القلب وجه الوطن
نخيلا و نيلا و شعبا أصيلا
و صناك يا مصر طول الزمن
ليبقى شبابك جيلا فجيلا "

أنا المصري

في ستة أكتوبر

الغالي ..

غرسنا المجد ...

بإدينا !

رفعنا كفوفنا للعالي ..

و صُمنا كمان ...

و صلينا !

لقينا الكلب

متكبر ..

ذكرنا الله و عدينا ..

دخلنا عليه

و بنكبر ..
و نخ النصر
لإيدينا ..
ولجل السبت كان
عيده ..
نويننا بمرّنا
نذيده ..
رفعنا الراية فوق
سينا !
ما انا المصري

....

انا المصري

وما تبصش لحالي الوقت !

أنا المصري اللي داق

الصعب ...
عشان ما بلاده
تتهنى ..
وعمري ف يوم
ما قولت ال لأ !
أنا الصابر على
غلبي ..
و انا الكاتم جحيم
قلبي !
و انا اللي غزلت من
يدي ..
سيوف تقطع إيدين
تتمد ...
عليكي بشر يا بلادي

...

ما انا الغازي و انا

العادي ..

لأي شيطان ف يوم

ناوي ..

يدوس أرضك باكون

غاوى ..

أكون سيفك ..

و اقيم الحد !

وانا اللي فرشت من

نيك ..

حيضان خضرة ...

ولجل الأرض كات

صفرة ..

رويها بدمي لجل العهد ...

وانا اللي حلفت اكون

سيك ..

في وقت الشدة

تلاقيني ..

طوفان ممدود لأبعد

حد !

ما انا المصري فما

تخافي ..

مسيرك يوم

هتتعافي ..

و رايتك في السما

تتمد !

تذموني ..

بسهم الحيرة ..

ترموني

وهتقولوا دا واد

مجنون..

أكيد سكران ..

...

فما بالكم بإن النفس

مش قابلة

و بتقولي !

تسيبني لمين ..؟

تفوتني لمين .. واديلنا

سنين ..

على دا الحال ..

وانا المغلوبة على أمري ...

و وهالك شقى عمري

عسل بمرار ..

بادوس على نفس

و باكمل ...

و مهماً يقسوا ..

باتحمل ..

و اديك شايف .. ما هوش

بايدي ..

ما لو بايدي ..

هاكون لك كل ما

ف نفسك ..

واكون نفسك

و امدك روح تعيش

بيها ..
و ها عمل إيه ؟
ما انا الوردة اللي ..
حبسوها ما بين ..
قضبان !
طمع فيها ...
وانا النسمة اللي ..
كتموها ..
عشان ما يعود ربيع
ليها ..
و اشكي لمين .. ؟
نزيف هم السنين تاني
خلاص أصبح
ملازمني ...

و انا و انت في موج عالي

ما بين شطين ..

و بتلومني !

لا كان بايدي .. ولا بايدك ..

نقاسي المر و نعاني

ده كل منايا اكون ..

عيدك ..

لكن قيودي منعاني ..

فسامحني !

....

لقيت نفسي

بعاتب نفسي جوايا ..

ما انا المجني ف حصاد مزروع ..

بقاله سنين ..

وانا الجاني لزرع ..
اخضرف بركة طين ..
وانا الغطان ..
فسامحيني

.....

و باحلفك هاعيش صابر ..
و رغم الحزن راح ..
اعافر ..
ومهما الضلمة هتكابر
مسير الفجر يحيني
مسير
الفجر
يحيني

أيوه ماتت

و قالتلي فارق ..
و انسى إنك كنت ليا
ف يوم .. حبيب !
وانسى حتى
إني أحبك ..
و احبي حلم ف بحر..
عشقك..
مات غريق!
....
لما قالت ...

كنت ساكت ! ..
كات حروفها سهم
نافذ ..
كات مخالب ..
ماشية تقطع في
الوريد ..
بس نسيت بعد
قولها ...
إن صعب العود
يخضّر ..
بعد ما ينشف و يبقى
يا دوب وقيد
وان قلبي محال ..
هايرجع ..

يصفى ثاني من جديد ..

هي قالت ..

أيوا قالت ..

بس جوه القلب ..

ماالتت ..

و الكفن كان طوق

حديد ..

أيوه ماتت

ملهاش ميعاد

يا اللي انتوا حاسبينها

بقلم !

و يا دوب بحبة

ذكريات !

فاكرين هتحيوا من

العدم ...

عضم اتفرم و صبح

رفات !

مين فينا بص وراه ...

و ظن ...

ف يوم هايخلق

معجزات ؟

....

عمر ك سمعت يا

محترم ...

عن يوم قيامة و ليه

ميعاد ؟

دا الموجة عليت من

عدم ...

يوم ما انعدم فينا

السكات !

....

فيضان و أعلن

ثورته ...

على شط ضيق

قبضته ...

ف لحظة ممات !

....

قامت سيول ...

وقت المطر ...

و الليل ساعاته

بتحتضر ..

لحظة ما فجر الكون

حضر ...

واعلن بحلمه المنتظر

انه انتصر ...

و الشط داالب !

كان كل دا من غير

ميعاد !

لو حلم ملضوم

بالسكات ...

و ف وسط ليل مليان

ضباب ...

صعب الأمل يطرق له باب ...

طول ما العزيمة فى التراب !

قصر الكلام !

ملهاش

م

ي

ع

ا

د

مات الكلام

مات الكلام .. و ما فيش

جديد ..

و لحد إمتى دمو عنا

تنزل وقت

عيد ؟

حواديتنا غلبت شهرزاد

و الحمل فوق اكتافنا

زاد ..

و الطوق حديد

نفس الحكاية بتتحكي

والدمعة نازلة ..

بتشتكي ..

وودانا تعبت م الحديث

أصبح خلااص

أصبح خلاص مكتوب

علينا ف كل عيد ..

ندفن شهيد !

مين السبب ؟

مين السبب إن الشهيد

أصبح شهيد ؟

إوعاك تقولي عشان

ما غدروا ف وقت

عيد ..

و او عاك تقولي إن

السبب إرهاب عنيد ..

لما انت عارفه

.. محتمل

و جنودنا لبلادنا الأمل ..

يبقي السبب .. إهمال

.. شديد

وف كل دور ..

نحمد و نشكر ربنا

.. إن ابننا ..

أصبح شهيد ..

لو كله مات و صبح

.. شهيد

مين اللي يفضل

.. للوطن

غير العبيد .. ؟

أشكوي لمين ؟

من وسط ميت مليون

كفن ..

قولت اسألك !

من قبل ما الروح

تندفن ..

و استسمحك !

ليه كل كلي

بيعشقتك ؟

و أكاد أشك

و محتمل !

إن الهوى اللي

ملكني في دنيتي
خد قلبي مني و مهجتي
و سرق عينيا يكون

عمل !

دا أكيد عمل !
مكتوب بطلمس من

دهب ...

لجل ان ادوق مرآك
رطب !

....

دقيت ببيان العرافين
لاجل اني أعرف
مين و فين ؟
فجاو بني فيهم شيخ

أمين ...
قال دا انت شارب
للركب ...
من قبل حتى ما
تتولد !
يا دى العجب !
طب كيف غزال يعشق
أسد ؟
لو حتى شارب ميت
عمل !
هاعشق كيان صايبه
الخلل ؟
ما هو مستحيل إن
الأمل ...

يفرد شراعه لميتين !

و انا فيكي ميت

بالحيا ...

و اللقمة متعاصة

بأنين !

و اشكي لمين ؟

....

ده ان يوم عاتبتك

م الألم ...

بتحوليني شيطان

رجيم !

و ان يوم صرخت من

الوجع !

بتملكيني ايدين لئيم !

.....

يا ام الغلابة المحرومين !

بزيادة قهرك

للجدع !

ده ان يوم طلع !

هيكون مصيرك

للجحيم !

و اشكي لمييبييين ؟

مين اللي قال ؟

مين اللي قال ان

البنات ..

ف الأصل كانت خلفه

طين ؟

لاهو كنت فين ؟

لاهو كنت فين و امك

يا واد ..

مولودة لسه ف لقتين ؟

مين اللي شالتك من

ضنا ...

و اتحممت غلبك ...

سنين ؟

بتنام حزينة

وبالها ..

تسقيك لبن ميان

حنين ..

ما تقولي مين ؟

....

و اوعاك تقولي انك

ذكر ..

لجل ان زرعك جاب

عيال ..

و انك سحبت من

المطر ..

حبات دكور صاغت

جنين ..

داف شرع ... مين ؟

....

ما تقولي مين ؟

لو جاي تقول جيبه

البنات ..

عيب م الذكر بسبب

جينات ..

طب قولي مين كان

م البشر ..

كامل كخير المرسلين ؟

كان كل خلفته من

البنات ..

أما الولاد ... ماثوا

و هما صغيرين !

تقدر تعيب يوم

ع الأمين ؟

لاهو كنت مين ؟

.....

و ان قولت مين هما

الحريم ...

افتح كتاب منزل

حكيم

هتلاقى مريم

و النساء ..

حاكمين لشرع المسلمين !

.....

و ان جيت و قولت البت

وحشتينى

أنا الحلم اللي كان

رافض ...

يعيش ذكرى ... !

أنا الأمل اللي عاش

يحلم ...

يشوف بكره ... !

أنا اللي ف غربتي

ضلك ...

ورغم الفرقة طيف

ننك ...

ما فارق لحظة عن

عيني ... !
أنا الماضي و أنا الحاضر
و أنا المشتاق ...
و مش قادر ... !
أقول كلمة وحشتيني .. !
لا انا عارف أعيش
بكره ...
ولا حتى ان اكون
نكرى ...
ولا بنظرة عينك
ألقي ...
ملك العشق ... يحييني ... !
و أقولك إيه ؟؟؟؟
وحشتيني

أنا القبطان

في بحر عيونك ...
الحلوين ..
باعيش رحال .. !
على دا الحال ...
لهيب موجك .. بيكويني !
ونظرة عين ..
بترويني !
وف الآخر ..
ببات عطشان !
ولما بترمي بشباكك
على عيونك ..

و رمشك حاضن ..

الأحلام !

أكون سهران ...

و متمني .. !

أزور حلمك ولو

إني ...

أعيش عمري ..

ما بين رمشك ..

يا دوب مكحال !

...

على دا الحال

و انا الجاني على

نفسي !

رسمت حدودي بين

.. شطك

و طول عمري بقول

.. نفسي

أدوق الشهد من

.. نبعك

و لو نبعك يسيل

بركان !

وانا اللي غزلت

برموشك !

قلوع تبجر في ميت إعمار ..

بعين غزلان !

ما أنا اللي اخترت اعيش

بيكي ...

و اكون ليكي ..

و لو فيكي ...
هاموت غرقان !
وهاعمل إيه ؟
ما
أنا
القبطان

ما تعرضهاش

شخص غريب بيناقض

نفسه ... !

كل ما يكتب ..

قلمه يغشه ... !

.....

اعرف شاعر ...

كله مشاعر ...

يكتب غنوة ...

تلف الدنيا ...

وأما تعاتبه ...

يعلي ف حسه ...

تغيظه

ينطق حاله بجهل

مريض ...

و يقولك كان أصله

عروض ...

وقت ما كان العدل

يسووود ...

اما اليوم أصبح

تعريض ...

لجل بشهرة عليا

تعود ...

.....

لما الشاعر يصبح

واطي ...

مين هيدافع عن
مظلوم ... ؟
و اما لخوفك يوم
هتطاطي ...
كيف العدل ف يوم
هايقوم ... ؟

مانيش شاعر

برغم اني مانيش

شاعر ...

ولا افهم حتى في

الأشعار ...

بارص كلام ..

واقول موال ... !

وبابني بيوت من

الأنهار ... !

واقيد فيها الشموع ...

بالناااار ... !

.....

و ازین وهمي
بالأفكار ...
واعيش فوق الجبال
بحار ... !
وبأفرش شمسي نص
الليل ... !
عشان ما اخلق ف ليلى
نهاالار ... !
والاقى الوهم في
الآخر ...
مغوصني في طين
والاعر ...
وقالى خلاالص بقيت
شالاعر ... !

مانيش شاعر ...

....

مانيش شاعر ...

بلاش يا كلام ملوش

داعي ... !

لا انا زهيري

و لا الساعي ...

ولا نوح اللي من

فكره ... !

يسوق الحرف

كالراعي ... !

يا وهم ضرير ماهوش

واعي ... !

سوهاجي الأصل

قالهاك ...

بعلو الصوت ...

منبيش

شالاعر ... !

عيد ميلادي

لما قالوا ان النهارده ...

عيد ميلادي !

رجعوني لذكريات ثلاثين سنة

وتسع سنين !

بالهم كانوا مزوقين

وبدم ننبى ..

محنين !

فاكريني هافرح إن انا

دقيت ببيان الأربعين !

(شئ عجيب)

لما تصحى ف يوم

وتلقى !

إن عمرك زاد

سنة !

وان قربك للنهاية

شيء مؤكد ..

إنما !

تلقى أهلك ... بالشموع

راسمين ف يومك

ملحمة !

فارشين ربيعك

ع الحيطان ..

و مزينين سقفك

هنا ...

نسيوا إنك ... بالدموع !

كات بدايتك ...

للضنا !

وان معنى العمر

عدى !

قرب نيك ... للمحكمة !

شئ غريب

طب ليه بننزل

للحياة ...

بادئين طريقنا ...

بالبكا .. ؟

والخطوة فيها بويل

و آآآه ...

و الدمعة فيها ...

مفرقة !

من جهانا قبلنا الأمانة ..

اللي الجبل منها

اشتكى .. !

وبنحتفل بأعياد ...

ميلادنا !

بين حبال المشنقة !

شئ غريب

عيد ميلادي !

عيد ميلادي يوم ما

اكون ...

ف القبر فرحان

باللقا !

مش ف دنيا آخرها

فانية !

بضحكة نازة من

الشقا !

أو ألقى ذنوبي

طارحة !

سكة آخرتها ... الجحيم !

عيد ميلادي ف يوم

مماتي !

وقت ما اهرب من

حياتي ...

وألقى روعي في

النعيم !

وقتها هأفرح و اناذي

بعلو صوتي ...

م الحنين !

النهارده عيد ميلادي

يوم ميلاد ...

الخالدين !

الفهرس

- الإهداء..... ٣
- غاب القمر..... ٤
- لحن الوفا..... ٩
- الفاطنة و القطار..... ١٥
- ما بين دارين..... ١٩
- حدوة بعد النوم..... ٢٤
- جابت ضرفها..... ٣٠
- الابن الحنون..... ٣٤
- ملحمة الأسود..... ٤٠
- أنا المصري..... ٤٦
- غريب الحال..... ٥١
- أيوه ماتت..... ٥٧
- ملهاش ميعاد..... ٦٠
- مات الكلام..... ٦٤

- ٦٧ أشكي لمين
- ٧٢ مين اللي قال؟
- ٧٧ وحشتيني
- ٧٩ أنا القبطان
- ٨٣ ما تعرضهاش
- ٨٧ ماتيش شاعر
- ٩١ عيد ميلادي
- ٩٧ الفهرس

